

## Dainuška

Ēsėtāisē Juonis pana –  
Ne tēp jauna, ne tēp sena.  
Ana bova vardo Marē,  
Sakies, kēlusi nu Žagarēs.

Vēskas būtom gerā bovē,  
Bet ta meilē greit sogriova.  
Ē pradiēgē Juonis gertē,  
Nier ramībēs, negal tvertē.

– Juoni, Juoni, grētiau kelkēs,  
Veiziek, goli šalēp pelkēs.  
Baliavuojē vēsa nakti,  
Prasiskielēs dar ē kakta.

– Juoni, vākāli, kon to dērbi?  
Kam to skaudini mon šērdi?  
A če rēk tēik prisēgertē,  
Ka nebstavuoji ni parētē.

– Jergau, mama, kon darītē?  
Kāp sau šērdi nogildītē?  
Kāp ēštrauktē baisi peili?  
Sokaliečiejē muni meilē.

– Spjauk to, Juoni, i tou Marē,  
Ku tēp gera tau padarē?  
So Aduomo sosidiejē  
Ēr i miesta ēšdolkiejē.

Daugiau šnapšēs nebeperk,  
Kuoki darba nositverk!  
Ka atēisi to i puota,  
Atsēras ē pana truopnē.